



TEZĂUR LITURGIC
1 IUNIE

ACATISTUL
SF. CUVIOS
DIONISIE
DE LA
GLUȘIȚK



MOSCOVA, 2000



Акафист
святому преподобному
Дионисию, игумену
Глушицкому, Вологодскому
чудотворцу

Кондак 1

Избранный воеводо воинов духовных, в пустыни обители возградивый и множество инок собравый, святостию жития и чудесы просиявый и Богу добре угодивый, преподобне отче Дионисие! Восхваляем тя с любовию, заступника нашего. Ты же, яко имеяй дерзновение ко Господу, молитвами твоими от всяких нас бед свободи, да зовем ти:

Радуйся, Дионисие, великий чудотворче.

Икос 1

Ангел земный и человек небесный был еси, преподобне отче Дионисие, утаивый от нас по

смирению твоему род твой и родители твоя, да уверимся, яко от Бога к нам пришел еси, равноангельнаго жития добрый учителю, приведи ко Господу многия души человеческия образом жития твоего святаго и учением твоим божественным. Темже ублажаема ты и поем ти сице:

Радуйся, звездо пресветлая, полнощную страну духовно просветившая.

Радуйся, светильниче немерцающей Божия благодати.

Радуйся, Евангелиа Христова верный послушателью.

Радуйся, яко взял крест твой, во след Христа усердно от юности и до старости маститыя ходил еси.

Радуйся, подвижническое духовное житие возлюбивый.

Радуйся, стопы твоя на путь спасения неуклонно направивый.

Радуйся, усиленно единого на потребу взыскавый.

Радуйся, блага нетленная и вечная паче тленных и скорогибнущих возжелавый.

Радуйся, тесноту и скорбь иноческаго жития избравый.

Радуйся, сожителства с преподобными искавый.

Радуйся, смирением святым благоукрашенный.

Радуйся, терпением крепким вся искушения вражия отразивый.

Радуйся, Дионисие, великий чудотворче.

Кондак 2

Видев преподобный игумен Дионисий, прозорливыми очесы своими благоплодную доброту души твоея, преподобне отче, егда пришел еси к нему во обитель Спасо-Каменскую, прият тя с любовию и наставляше богомудре на подвиги духовныя; ты же, преблаженне, вся словеса его слагал еси в сердце твоём, и явился еси добрый ученик добраго учителя, зовый купно с ним Небесному Учителю Христу немолчную песнь: Аллилуиа.

Икос 2

Разумев тя сосуд избран Божия благодати быти, игумен Дионисий возлюби тя, отче

преподобне, и постриже во святой иноческий образ, наименовав тя в пострижении именем своим Дионисий, да будеши ему подражатель именем и дела преподобными. Сие воспоминающе, с любовью тебе зовем:

Радуйся, иноче боголюбезный, волю твою воли Божией повинувый.

Радуйся, по Бозе послушание совершенное настоятелю твоему явивый.

Радуйся, за кротость нрава всею братиею любимый.

Радуйся, тяготы ближних твоих с любовью носивый.

Радуйся, во трудех и подвизех иноческих преуспевый.

Радуйся, вся послушания монастырская без ропота исполнявый.

Радуйся, праздность душегубительную возненавидевый.

Радуйся, молитвы и бдения всенощныя возлюбивый.

Радуйся, первый на молитву во храм Божий приходивый.

Радуйся, последний по скончании богослужения из него исходивый.

Радуйся, приметавыйся усердно в дому Божии.

Радуйся, яко душу твою в дом Духу Святому уготовал еси.

Радуйся, Дионисие, великий чудотворче.

Кондак 3

Силою Всевышняго укрепляемый, вся искушения диавольская бодренными молитвами твоими победил еси, отче Дионисие, и в новоначалии иночестем велик подвижник показался еси, о немже игумен Дионисий и братия его радовахуся и славляху Бога, поюще Ему: Аллилуиа.

Икос 3

Имея помысл чист и непорочну душу, и виде в себе почитаема в Спасо-Каменстей обители, отче Дионисие, яко смирения рачитель, умыслил еси бежати оттуду в безмолвие пустыни, да не превозношением суетным уловлен будеши. Темже, получив благословение твоего настоятеля, вкупе со другом твоим, преподобным Пахомием, удалился еси из

обители в пустынное место, на святую Луку, и тамо безмолвно пребывал еси в постех и молитвах, идеже, аки сретающа тя, земнаго ангела и небеснаго человека, благоумиленно вопием ти:

Радуйся, безмолвия рачителю, пустыню духовно у плодоносивый.

Радуйся, подвижническим житием твоим сию прославивый.

Радуйся, древо благоплодное, при водах пустынных возрастшее.

Радуйся, плоды многия Христу принесый.

Радуйся, сладость безмолвия пустыннаго вкусивый.

Радуйся, постом и воздержанием плоть твою духу покоривый.

Радуйся, молитвами слезными пламень страстей в себе угасивый.

Радуйся, безстрастие благодатное стяжавый.

Радуйся, богомыслием непрестанным ум твой просветивый.

Радуйся, трезвение молитвенное приобретый.

Радуйся, божественного имене Иисус Христова немолчный призывателю.

Радуйся, заповедей Христовых ревностный хранителю.

Радуйся, Дионисие, великий чудотворче.

Кондак 4

Буря искушений диавольских не поколеба твоего терпения и мужества в пустыни, преподобне отче, но яко крепкий адамант, не изменился еси от приражений древняго змия человекоубийцы, и сия крепкими молитвами твоими победоносно отразил еси, во смирении глубоцем пребывая и со слезами вопия ко Господу: Аллилуиа.

Икос 4

Слышим тя, преподобне отче, храм Божий во имя великаго святителя и чудотворца Николаа в пустыни твоей, на святей Луце, люботрудно создавшаго, к немуже во иереа посвящен был еси от руки архиепископа Ростовского Григория, и яко храмоздатель благословенный и священнотаинник Божия благодати, достойно слышиши от нас сицевая:

Радуйся, храм Божий в души твоей создавый.

Радуйся, жертвы непорочныя Богови
принесый.

Радуйся, преподобно и праведно поживый.

Радуйся, дерзновение многое ко Господу
стяжавый.

Радуйся, молитвами твоими знамения и
чудеса совершаяй.

Радуйся, благодати Божия преисполненный.

Радуйся, блаженный храмоздателю.

Радуйся, обители пустынный основателю.

Радуйся, многая чада духовная собравый.

Радуйся, ко спасению их добре руководивый.

Радуйся, правило преподобнаго иноческаго
жития.

Радуйся, образе богоугождения истиннаго.

Радуйся, Дионисие, великий чудотворче.

Кондак 5

Богомудре управляя еси, отче Дионисие,
обителию пустынною на святей Луце, яже крин
в пустыни, процвете духовно: обаче, стужив си
молвою человеческою, настоятельство в ней
вручил еси спостнику твоему, преподобному

Пахомию, сам же удалился еси в пустыню глубочайшую, на реку Глушицу, да тамо един Единому Богу возможеша невозбранно пети ангельскую песнь: Аллилуиа.

Икос 5

Видев красоту места пустынного в лесной дебри, на реке Глушице, отче преподобне, и слышав на нем звон церковный, познал еси волю Божию, тамо тебе вселиться и обитель возградити; темже помолився со слезами, келлию малу под деревом черемховым тамо себе построил еси, освятив место оное во обитель во имя Пресвятыя Богородицы, честнаго и славнаго Ея Покрова, идеже мы ныне тя ублажаем и поем:

Радуйся, пустынножителей славо и похвало.

Радуйся, дивный избранниче Божий, дебрь пустынную иноки населивый.

Радуйся, лавру преславную тамо соорудивый.

Радуйся, изрядный слуго Пресвятыя Богородицы.

Радуйся, верный угодниче Сына Ея и Бога.

Радуйся, присный радетелю о душах человеческих.

Радуйся, сотворивый свое спасение труды и молитвами, и иныя томужде научивый.

Радуйся, велий нареченный во Царствии Небеснем.

Радуйся, горлице пустыннолюбивая, Глушицкую дбрь пением молитвенным огласившая.

Радуйся, в пустыни славословии непрестанными Бога славивый.

Радуйся, слез твоих теченьми бесплодную землю духовно напоивый.

Радуйся, прозябения богоугодная на ней возрадивый.

Радуйся, Дионисие, великий чудотворче.

Кондак 6

Проповедает пустынная Лавра твоя, отче Дионисие, труды и подвиги твоя, при устроении ея подъятыя, како сооружая в ней храмы Божия, рукама твоима ко труду делателей прикасался еси, иконы же святыя для них благолепно написал еси, искусный иконописец быв. Темже ныне во храмах небесных почиваеши и лицезрения Божия

наслаждаешься, зовый всех Творцу со ангелы и святыми: Аллилуиа.

Икос 6

Воссиял еси яко солнце пресветлое в пустыни Глушицтей, отче Дионисие, и сиянием добрых дел твоих привлекл еси во обитель твою многи ревнители богоугождения истиннаго, иже стекахуся к тебе отвсюду, да руководиуещи их ко спасению; и тако многая чада о Христе стяжал еси, преблаженне, от нихже угодницы Божии, преподобнии ученицы твои, Амфилохий, Макарий, Тарасий и Феодосий, вкупе с тобою в лице святых прославлени суть от Господа. С ними убо тя восхваляем и зовем:

Радуйся, авво богомудрый, инок множество собравый.

Радуйся, даров Святаго Духа сосуде непорочный.

Радуйся, ученики святыя и богоугодныя духовно воспитавый.

Радуйся, купно с ними на небеси и на земли прославленный.

Радуйся, общежитие братское во обители твоей учредивый.

Радуйся, уставы его сам верно всегда хранивый.

Радуйся, послушание имети братии твоей законоположивый.

Радуйся, непослушание в них грозно наказавый.

Радуйся, яко милостыню убогим неоскудно подавал еси.

Радуйся, яко во дни глада во обители твоей многи препитал еси.

Радуйся, татем похитившым достояние обители твоея, не мстивый.

Радуйся, добром за зло им воздавый.

Радуйся, Дионисие, великий чудотворче.

Кондак 7

Хотя враг спасения человеческого устрашити тя, преподобне отче, привидении своими смущаше тя во время нощныя твоея молитвы, и дважды биением лютым урани твое тело, яко быти на нем язвам многим; обаче ты непоколебим в подвизе твоём пребыл еси, и язвы сия доблественне носил еси, яко воин Иисус Христов и мучеников сострадалец. Темже

власть велию на духи нечистыя от Господа получил еси, яко прочее не дерзати им приступити к тебе, внегда пел еси Богу: Аллилуиа.

Икос 7

Новую обитель иноческую в пустыни Сосновецтей возградил еси, преподобне отче, и в ней храм Божий, во имя Предтечи Господня Иоанна, создал еси, в нюже из лавры твоея на безмолвие уединялся еси, и заповедал еси, да тамо по кончине твоей погребен будеши, да не запустеет место сие, тобою возлюбленное. Поминающе убо таковое твое о безмолвии рачение и благое ко смерти приуготовление, зовем ти:

Радуйся, маслино благоплодная, в пустыни возрастшая.

Радуйся, елеем добрых дел твоих души верных умастивый.

Радуйся, древних великих преподобных отец дивный подражателю.

Радуйся, Фиваиды Российския основателю.

Радуйся, до старости маститыя Богу неленостно послуживый.

Радуйся, хлеб сух единойды в день
вкушавый.

Радуйся, в посте суровем и молитвах
непрестанных всю жизнь твою препроводивый.

Радуйся, покой телесный возненавидевый.

Радуйся, книги и иконы святые трудолюбно
писавый.

Радуйся, сна и отдохновения мало
приимавый.

Радуйся, вся творивый во славу Божию и на
пользу душевную ближних твоих.

Радуйся, всего себе в жертву благоприятну
Богви принесый.

Радуйся, Дионисие, великий чудотворче.

Кондак 8

Странника и пришельца в мире сем
помышляя себе быти, преподобне отче, о часе
смертнем непрестанно памятовал еси, и могилу
себе в Сосновецтей обители твоей рукама
ископал еси, над неюже молитвенно плакал еси,
вспоминая смерть и суд Божий. Молим тя,
угодниче Божий, примером твоим святым научи
и ны грешныя не забывати грозного часа

смертнаго, но присно готовится к нему и благоумиленно пети Богу: Аллилуиа.

Икос 8

Весь в Бозе быв, преподобне отче, о Бозе и благоугождении Ему беседовал еси со ученики твоими, со слезами умолял их верно хранить заповеди Христовы. Темже, яко возшедый на высоту совершенства духовнаго, видений и откровений божественных сподобился еси, и прозорливства дар свыше получил еси, да и мы тебе поем:

Радуйся, врачу благоискусный недугов душевных.

Радуйся, будущая яко настоящая провидевый.

Радуйся, ангела Божия видети сподобивыйся.

Радуйся, о умножении братии во обители твоей извещение от него приемый.

Радуйся, благоволением Пресвятыя Богородицы осененный.

Радуйся, храм Божий прекрасен во имя Ея Святое соорудивый.

Радуйся, многия храмы Божия не токмо во обителях твоих, но и во окрестных всех люботрудно построивый.

Радуйся, о славословии Божии зело поревновавый.

Радуйся, нищий духом, но многия духовно обогативый.

Радуйся, кроткий сердцем, с ненавидевшими ты мирен бывый.

Радуйся, истинный Христов подобниче.

Радуйся, ангелонравный человекче.

Радуйся, Дионисие, великий чудотворче.

Кондак 9

Вси ученицы твои, преподобне отче, горце плакаху, егда собрав их, поведал еси им приближение твоея кончины, и настоятеля им, вместо себе, преподобнаго Амфилохия поставил еси, заповедав тому блюсти устав общежительный во твоих обителях и верно руководити братию твою ко спасению, да благоприятно поют Богу: Аллилуиа.

Икос 9

Ветии человечестии не довлеют ко изглаголанию любви твоея святыя, преподобне отче Дионисие, еяже ко учеником твоим преисполнен был еси, егда возлежа на одре смертнем, последнее поучение им сотворил еси, богомудренно увещая их любовь имети между собою и ничтоже предпочитати паче любви Христовы. О сем умиляющесе душами нашими, вопием ти:

Радуйся, священное главо, Троическою зарею свыше озаренная.

Радуйся, источниче медоточный учения божественнаго.

Радуйся, ученики твоя приискренне возлюбивый.

Радуйся, вся нужная ко спасению им возвестивый.

Радуйся, всю братию твою простивый и благословивый.

Радуйся, посмертныя молитвы твоя им обетовавый.

Радуйся, яко светел и радостен на одре смертнем возлежал еси.

Радуйся, яко благонадежен о спасении твоём был еси.

Радуйся, свято и богоугодно течение земное совершивый.

Радуйся, честно и преподобно о Господе почивый.

Радуйся, яко три дни пред кончиною твоею в совершенном безмолвии препроводил еси.

Радуйся, яко молитвы богоумиленныя Господеви возносил еси.

Радуйся, Дионисие, великий чудотворче.

Кондак 10

Спасения души твоея и благоустроения святых обители твоея с плачем просил еси у Господа Иисуса Христа и Пречистых Его Матере, преподобне отче Дионисие, и извещение благое получил еси от Пресвятыя Богородицы, яко вся просимая тобою исполнена будут, и яко Сама Она будет присная Покровительница и Заступница обители твоея. Темже радостно воспел еси Сыну Ея и Богу: Аллилуиа.

Икос 10

Царя Небеснаго Христа раб был еси, преподобне отче, во вся дни жития твоего земнаго: темже и кончиною предивною прослави тя Господь, яко истиннаго угодника Своего; светом бо небесным возсия лице твое при исходе твоём, и венец сияй видим бысть на главе твоей, и вся келлия твоя исполнися благоухания, егда предал еси святую душу твою в руке Божии. О сем чудящися, аки надгробную песнь приносим ти благохваления таковая:

Радуйся, великий угодниче Божий, яко светлою кончиною твоею ученики твоя удивил еси.

Радуйся, яко плачь их утешением духовным изменил еси.

Радуйся, сиротство их духовно вознаградивый.

Радуйся, печаль их благодатно утоливый.

Радуйся, вечноблаженныя жизни наследниче.

Радуйся, нетленныя радости святых сопричастниче.

Радуйся, венценосче, от Христовы десницы увенчанный.

Радуйся, сиянием Трисолнечным озаренный.

Радуйся, во светлостех святых опочивый.

Радуйся, воздаяние трудом твоим тамо получивый.

Радуйся, обители твоея святых похвало и радование.

Радуйся, Церкви Христовы благодатное украшение.

Радуйся, Дионисие, великий чудотворче.

Кондак 11

Пение погребальное со слезами многими совершаху ученицы твои, преподобне отче, над телом твоим святым, провождающе тя к месту смертнаго твоего упокоения во обитель Сосновецкую: и се абие ста конь, иже гроб твой везяше, и не двигашеся по пути. Сие же видев, преподобный Амфилохий повеле, да иный, любимый тобою конь впряжен будет в колесницу: и той легче довезе тя до могилы; сиевое погребение твое благоговейно воспоминающе, поем Дивному во святых Своих Богу хвалебную песнь: Аллилуиа.

Икос 11

Светоподательный светильник Божия благодати являешься и по смерти, преподобне отче Дионисие, совершая чудеса многая от святого твоего гроба, от негоже недужнии исцеляхуся, слепии зрение получаху, бесноватии от мучительства диаволя свободяхуся, и всем требующим обильно милость Божия подавашеся. Сего ради вопием ти усердно:

Радуйся, благодатных даров всещедрый подателю.

Радуйся, недугов злых прогонителю.

Радуйся, врачу безмездный и скоропредстательный.

Радуйся, целебниче благодатный.

Радуйся, в сонних и видениях верная посещай.

Радуйся, ближним и дальним помощь твою являй.

Радуйся, ослабленных укрепителю.

Радуйся, на духи нечистыя крепкий воителю.

Радуйся, от привидений и страхований вражиих многия избавивый.

Радуйся, бесноватых от томления диаволя свободивый.

Радуйся, ходатаю наш присный.

Радуйся, молитвенниче за ны немолчный.

Радуйся, Дионисие, великий чудотворче.

Кондак 12

Благодать Божия, осеняющая святую и многоцелебную раку мощей твоих, преподобне отче Дионисие, и крепкое предстательство твое ко Господу о всех, с верою притекающих ко твоему заступлению, увериша во святости твоей Собор святителей святых Всероссийския Церкви, иже торжественно к лику святых Божиих тя причтоша и чудотворца преславна тя наименоваша, поюще Богу, тя прославльшему, песнь: Аллилуиа.

Икос 12

Поем подвиги и чудотворения твоя, великий угодниче Божий, прославляем благосердие твое и милость ко всяцей души христианстей, помощи от тебе ищущей, не таим великих благодеяний твоих, явленных и присно являемых тобою верующим и молебно совершающе святую память твою, во псалмех и

песнех духовных, сие благоумленно тебе
зовем:

Радуйся, Пресвятая Владычицы Богородицы
всеусердный почитателю.

Радуйся, ангельских ликом собеседниче.

Радуйся, Предтечи Господня
пустыннолюбивый подражателю.

Радуйся, патриархов ветхозаветных
непорочным житием подобниче.

Радуйся, пророком Божиим прозорливостью
равночестный.

Радуйся, апостолом Христовым правою
верою единокравный.

Радуйся, святителей богомудрых
прехвальный учениче.

Радуйся, мучеников многострадальных в
терпении соревнователю.

Радуйся, преподобных светлая красото.

Радуйся, праведных сонаследниче.

Радуйся, всех святых присный друже.

Радуйся, Дионисие, великий чудотворче.

Кондак 13

О великий угодниче Божий и преславный чудотворче, преподобне отче Дионисие! Вонми гласу молений и пений наших, в похвалу тебе приносимых, и умоли Господа Бога избавити нас от геены огненныя и сподобити блаженства святых, да купно с тобою вопием Ему во веки: Аллилуиа.

Этот Кондак читается трижды, затем Икос 1-й и Кондак 1-й

Молитва 1

О священная главо, предивный подвижниче, преславный чудотворче, преподобне и богоносне отче Дионисие! К тебе прибегаем с верою и молимся с любовью от души: помолися за ны грешныя ко Господу, Воздателю и Промыслителю нашему, и испроси нам от Него великия и богатыя милости: здравие, благоденствие, земли плодоносие, воздуха благорастворение, мирное и безмятежное во благочестии житие, веры Православныя умножение, обители твоей святей благоустроение, и всем подвизающимся в ней и на поклонение приходящим милость Божию и спасение; и паки молим испросити у Господа:

страждущую страну Российскую от лютых безбожников и власти их да свободит, и да возставит престол православных правителей; верных рабов Его, в скорби и печали день и ночь вопиющих к нему, многоболезный вопль да услышит и да изведет от погибели живот наш, и паки припадающе к тебе, яко чада твоя, отца нам суца, просим: святыми молитвами твоими приведи нас в тихое пристанище жизни вечныя, и сподоби нас житие сие временное благочестно и богоугодно скончати, мирную христианскую кончину получитьи и унаследовати Царствие Небесное, человеколюбием, благостию и милостию Отца, и Сына, и Святаго Духа, в Троице славимаго Бога, и твоим святым заступлением, во веки веков. Аминь.

Молитва 2

О великий Христов угодниче, святой и многомогущий наш предстателю и всея северныя Вологодския страны небесный покровителю, преподобне и преблаженне отче Дионисие! Ты на Небеси Престолу Пресвятыя Троицы со ангелы предстоиши, zde же на земли, во всечестнем сем храме, святыми мощами твоими почиваеши, и данною ти силою свыше

благодатию многоразличныя совершаеши чудеса, недужным исцеления подавая; ты святыя и преподобныя ученики стяжал еси на месте сем, Амфилохиа, Макариа, Тарасиа и Феодосиа, с нимиже ныне радости нетленныя во обителех небесных наслаждаешия и на многомощныя молитвы за нас грешных сия вкупе с тобою подвизаеши. Призри убо милостивно на предстоящя честней раце твоей люди, умиленно молящяся и просящя от тебе помощи и заступления. Простри молитвенно ко Господу Богу преподобней твои руке, и яко имей велие к Нему дерзновение, испроси нам от Него оставление согрешений наших вольных и невольных; в болезнях страждущим даруй исцеление, скорбящим утешение низпосли, бедствующим скорую помощь твою подаждь, всем же чтущим тя помилование и спасение и во всем благом благое поспешение исходатайствуй: да твоим святым предстательством получивше благодать и милость от Господа, Царствие Небесное унаследуем, и вкупе с тобою и со ученики твоими прославим великое человеколюбие Троидинаго Бога, Отца и Сына, и Святаго Духа, во веки веков. Аминь.

Молитва 3

О добрый наш пастырю и наставниче, святых обители сея приснопоминаемый первоначальниче и основателю, преподобный отче Дионисие! Памятующе любовь твою ко учеником твоим и твое попечение о их душевнем спасении, припадаем ти и молимся: помози и нам грешным, святыми молитвами твоими, покаянием очиститися от грех наших и достойным явитися помилования и прощения от Господа и Создателя нашего; соблюди предстательством твоим святую обитель твою и всю страну Православно-Российскую невредимы от всякаго зла, и вся люди, жительствующия во обители твоей и на поклонение к тебе приходящия во оную, осени небесным твоим благословением, и в скорбех, бедах и болезнях утешение, избавление и исцеление молитвенно им подаждь: да благодарно славим и величаем Господа, Дивнаго во святых Своих, чрез тебе нам благодетельствующаго и дивно в тебе прославльшагося, Отца и Сына, и Святаго Духа, во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**